

范石湖詩集卷之十一

婺源黃昌衢康謠叅訂

宣城袁啓旭士旦校閱

麻線堆

峽中驛前大山峒起舊年攀而上縈紆如線十五年前浮圖德寶伐木作

新路有感作麻線堆

雲木盪胸起鬱城一峰危上有路千折纏縷如縈

絲是為麻線堆厥險天下稀偏仄容半足顛墜寧

復稽騰猿尙愁苦遊子將安之浮圖德寶者悲智

緒等慈隨山刊古木尋壑得長磯輿梁捷飛度布

石綿階梯自從新路改舊路無齋谷縣有孫少府

璇琰文詞勿云此事小惟有行人知况觀峽山
路由來欠平治官吏既弗跡誰肯深長思天險固
自若當令略成蹊土工運畚挿石工操鑿椎烈火
敗礮确築沙填隙噉多用百夫力遠無五旬期但
冀米鹽給不煩金幣支非客敢竊議道停詢旄倪
身雖雪山戍亦願助毫釐工費嗟小哉政須賢有
司東有管夸陵西有葉秭歸上維沈隱侯夔臺今
吏師下維熊絳孫長材佐州麾豈吾金閨彥不如
林下緇懸知議克合了此一段奇舟楫潢潦置
郵疾飛馳憧憧吳蜀客來往當無時仍磨鑽天石

大書四賢詩不佞願秉筆遠繼峽口碑

戲書麻線堆下

一身半世走奔波疑是三生宿債多折券已饒麻
線嶺責償難免竹竿坡

胡孫愁

傾崖當胸石齧足失勢毛羗槁幽谷王孫卻走斷
不到惟有哀猿如鬼哭僕夫酸嘶訴道窮我亦付
命無何中悲風忽來木葉戰落日虎嘯枯竹叢

判命坡

鑽天嶺上已飛魂判命坡前更駭聞側足二分垂

壞磴舉頭一握到孤雲微生敢列千金子後禍猶
幾萬石君早晚北窗尋噩夢故應含笑老榆枌

千石嶺

晨光挂高嶺晴色媚遠客哀湍吼叢薄宿霧裊絕
壁露重蘚花紫風來蓬背白迷山朴渥跳飲澗於
菟迹層巔多朽木迳磴有危石不知山幾重杳杳
入叢碧

九盤坡布水

莫惜縈迴上九盤洗心雙瀑雪花寒野翁酌水煎
茶獻自古人來到此難

荒口

十步九喫蹶百夫半躓踣豁然鳥道窮努力造其
巔謂是嶺頭子一峰復當前旣無反顧法仰坐心
茫然

四十八盤

詰曲不前如宦拙欹傾當面似交難若將世路比
山路世路更多千萬盤

紫荷車

峽山此藥甚多

綠英吐弱線翠葉抱修莖蠹如青旄節草中立亭
亭根有卻老藥鱗皺友松苓長生不暇學聊冀病

身輕

錦帶花

東南甚珍此花峽中漫生山谷

妍紅棠棣妝弱綠薔薇枝小成一再來飄飄隨舞
衣吳下嫵妨檻峽中滿荒陂佳人墮空谷皎皎白
駒詩

入秭歸界

山根繫馬得漿家溪入窮鄉事可嗟蚯蚓崇人能
作瘴茱萸隨俗強煎茶幽禽不見但聞語野草無
名都著花窈窕崎嶇殊未艾去程方始問三巴

早發周平驛過清烈祠下

祠前有獨醒亭屈
原祠也

物色近人境喜歡嚴曉裝山月雞犬聲野風麻麥
香登嶺旣開豁入林更清涼三呼獨醒士儻肯醜
我觴

白狗峽

江紋圓復破樹色春還明連灘竹節稠洶怒奔奔
陵石磯鐵色頑相望如姦朋踞岸意不佳當流勢
尤獍山回水若盡但見青嶺嶰慘慘疑鬼寰幽幽
無人聲顛沛安危機艱難古今情俯窺得目眩卻
立恐神驚白雲冒岩扉下維玉虛庭神仙坐閱世
應笑行人行

秭歸縣

永日貪程客長年吊古詩悲秋荒故宅頁石慘空
祠峻壁鴉翻倦高畬麥秀遲窮山熊繹國偏仄建
邦時

歸州竹枝歌二首

東鄰男兒得湘累西舍女兒生漢妃城郭如村莫
相笑人家伐閱似渠稀

東岸艤船拋石門西山炊烟連白雲竹籬茅舍作
晚市青蓋黃旂稱使君

昭君臺

天生尤物元無種萬里巴村出青塚高臺望思臺
已荒東風漲溪流水香嬋娟鍾美空萬古翻使鄉
山多醜女炙眉作癥亦不須人人有瘦如瓠壺

鮮甕

在歸州郭下長石截然號峽中最險處

懷沙祠下鐵色磯中流東湍張禍機與齋俱入彼
可市乘流而行吾亦危江河難犯一至此天地好
生安取斯朝歌勝母古今諱我其覆醯航秭歸

巴東峽口

水宿頻欹側徒行又險艱舟危神女峽馬瘦鬼門
關照夜燒畬隴緣雲種竿山催成頭雪白休說鬢

絲斑

初入巫峽

鑽火巴東岸，縱金峽口船。東江崖欲合，漱石水多
旋。卓午三竿日，中間一罅天。偉哉神禹跡，疏鑿此
山川。

將至巫山遇雨

峽行水落惟憂雨，通夕淋浪怨行旅。千山萬山生
白烟，陽臺那得雲如許。賡詞騰告翠帷仙，我一
晴翻手間放開。十二峰形色重賦，碧叢高插天。

巫山高 并序

余舊嘗用韓無咎韻題陳季陵巫山圖考宋玉賦
意辨高唐之事甚詳今過陽臺之下復賦樂府一
首世傳瑤姬爲西王母女嘗佐禹治水廟中石刻
在焉

濕雲不收烟雨霏，峽船作灘梢廟磯。杜鵑無聲猿
叫斷，惟有饑鴉迎客飛。西真功高佐禹跡，斧鑿鱗
皴倚天壁。上有瑤簪十二尖，下有黃湍三百尺。蔓
花蚪木風烟昏，蘚珮翠帳香火靈旂飄。忽定何
許時，有行人開廟門。楚客詞章元是諷，紛紛餘子
空嘲弄。玉色頰頰不可干，人間錯說高唐夢。

刺瀆淖

并序

瀆淖盤渦之大者峽江水壯則有之或大如一間
屋相傳水行峽底遇暗石則瀆起已而下旋爲窩
然亦未嘗有定處或無故突然而作叵測也再行
遇之小則欹傾大則與齋俱入險惡之名聞天下
峽江饒暗石水狀日千變不從灘瀧來但畏瀆淖
見人言盤渦耳夸險顧有間仍於非時作未可一
理貫安行方熨穀無事忽翻練突如湯鼎沸翁作
茶磨旋勢迫中成窪怒霽外始暈已定稍安慰儻
作更驚眩漂漂浮沫起疑有潛鯨喫勃勃駭浪騰

復恐蟄鼇扑篙師瞪視魄灘戶呀雨汗逡巡快大
敵勇往決鏖戰幸免與齊入還憂似蓬轉驚呼招
竿析奔抹竹竿斷九死船頭爭萬苦石上牽旁觀
兢薄冰撇過捷飛電前余叱馭來山險固嘗偏今
者擊楫誓豈復憚波面澎澎三峽長颭颭一葦亂
旣微掬指忙又匪科頭漫天子賜之履江神敢吾
玩但摧疊鼓轟往助雙檣健

嘲峽石

并序

峽山江濱亂石萬狀極其醜怪不可形容舉非世
間諸所有石之比走筆戲題且以紀異

峽山狠無情其下多醜石頑質賈憎乖傀狀發笑
啞麤類墳壤黃沉漬鐵矢墨或如溝泥浣或似凍
壁圻堆疑聚廩粟侈若壞城甃槎牙鏤朽木狼藉
奠枯骸礪砢包羸蚌淋漓錮鉛錫縱紋瓦溝隴橫
疊衣摺襞鱗皴斧鑿餘坎窞躑踏力云河清淑氣
孕此譎詭跡我本一丘壑嗜石曰成癖端溪紫琳
映洮河綠沉色階冊截肪膩泗磬鳴球擊嵌空太
湖底偶立韶江側真陽刺千岩營道剉寸碧倦游
所閱多未易一二籍竭來茲山下刺眼昔未覲或
云峽多材奇秀鬱以積絕代昭君村驚世屈原宅

東家兩兒女氣足豪萬國山石何重輕奚暇更融
液我亦味其言作詩曉行客

勞畚耕 并序

畚田峽中力耕火種之地也春初斫山衆木盡蹶
至當種時伺有雨候則前一夕火之籍其灰以糞
明日雨作乘熱土下種卽苗盛倍收無雨反是山
多磽确地力薄則一再斫燒始可藝春種麥豆餅
餌以度夏秋則粟熟矣官輸甚微巫山民以收粟
三斛者爲率財用三四斛了二稅食三物以終年
雖平生不識秔稻而未嘗苦饑余因記吳中號多

范石湖詩集八
嘉穀而公私之輸願重田家得粒食者無幾峽農
之不若也詩以勞之

峽農生甚艱斫畚大山巔赤埴無土膏三刀財一
田頗具穴居智占雨先燎原雨來亟下種不爾生
不蕃麥穗黃剪剪豆苗綠芊芊餅餌了長夏更遲
秋粟繁稅畝不什一遺秉得饜餐何曾識秔稻捫
腹常果然我知吳農事請為峽農言吳田黑壤腴
吳米玉粒鮮長腰瓠犀瘦齊頭珠顆圓紅蓮勝彫
胡香子馥馥蘭或收虞舜餘或自占城傳早秬與
晚秬爛炊甑甌間長腰米狹長亦名箭子齊頭白
圓淨如珠紅蓮色微赤香子亦

名九里香斗米入數合作飯芳香滿案舜王稻焦
頭無鬚俗傳替賸燒種以與之占城種來自海南
穉種種禾價最賤以不辭春養禾但畏秋輸官姦
上皆吳中米品也
吏大雀鼠盜胥衆螟蝻掠剩增釜區取贏折緡錢
兩鍾致一斛未免催租癥重以私債迫逃屋無炊
烟晶晶雲子飯生世不下咽食者定游手種者長
流涎不如峽農飽豆麥終殘年

巫山縣自此復登陸至夔門縣前棹石灘最
險登岸以過舟謂之盤灘城樓對高
唐門此去瞿唐不百里縣人以郭西流石堆
為水信流石沒則灩澦如馬矣

借馬巫山縣盤舟棹石灘梅肥朝雨細茶老暮烟
寒門對高唐起江從灩澦難流堆三尺在旅夢一

范石湖言集九
枝安

自巫山道陸以避黑石諸灘大雨不可行泊
驛中泊日吏士自秭歸陸行者亦會

巫山信是陽雲臺客行五日雲不開陰晴何嘗有
朝暮夜雨少休明復來今朝水長不知數沒盡山
根蒼石堆東磯西磯盡如削大灘小灘俱若雷不
知瞿唐復何似想見萬頃淙一杯祇今水劑已壯
矣聞道陸程尤艱哉摩圍隘口石生角蹋颯坡前
泥似醅眼前安得故園路江沙江草便青鞋

燕子坡

大山如牆缺小山如塚纍衆山直下看方知此峰
危木末見夔峽一溝盎春泥中有天下嶮造化其
兒嬉峰頂不滿笑舟中鬢成絲登高尙超覽况乃
絕俗姿

鬼門關

天作龍頭石闕人言要隔塵樊百年會須作鬼無
事見穿鬼關

離巫山好晴午後入瞿唐關憩高齋半日

一昨題詩訴苦霖果然連夜卷曾陰盡收行雨瑤
姬賜不徇世情巫峽心喜鵲滿枝朝日淡哀猿何

處宿雲淡水門山徑高齋外一枕清風屏萬金

灩澦堆

灩澦之石誰劖鑿惡駭天下形眇然客行五月潦
始漲但見匹馬浮黃湍時時吐沫作瀆淖潏潏有
聲如粥煎蜀江西來已無路鑿山作澮方成川瞿
唐之口狹如帶乃欲納此江漫漫奔流下赴故偏
仄汝更爭道當其前舟師欲傾落膽過石孽木禍
吁難全山川丘陵皆地險惟此險絕餘難肩東坡
筆端喙三尺願與作賦評嘲喧去非此石峽更怒
白頭忽作傾城妍我從巫山飛一棹歡喜偶脫蛟

龍涎是非信否未暇詰且上高齋清晝眠

夔州竹枝歌九首

五月五日嵐氣開南門競船爭看來雲安酒濃麴
米賤家家扶得醉人迴

赤甲白鹽碧叢叢半山人家草木風榴花滿山紅
似火荔子天涼未肯紅

新城果圓連灩雨枇杷壓枝杏子肥半青半黃朝
出賣日午買鹽沽酒歸

瘦婦趁墟城裏來十五五市南街行人莫笑女
麤醜兒郎自與買銀釵

白頭老媪簪紅花黑頭女娘三髻丫背上兒眠土
山去採桑已閒當採茶
百衲畚山青間紅粟莖成穗豆成叢東平屯田秔
米軟不到貧人飯甑中
白帝廟前無舊城荒山野草古今情只餘峽口一
堆石恰似人心未肯平

灩澦如樸瞿唐深魚復陣圖江水心大昌鹽船出
巫峽十日泝流無信音

當筵女兒歌竹枝一聲三疊客忘歸萬里江邊有
船到繡羅衣服生光輝

雲安縣

春暮子規少日斜紅鴝飛兩山多布木一島幾柴

扉蚓吐無窮壤人行不斷磯巴陽昨夜雨灘上水

先肥杜子美詩云涪萬無杜鵑黃鴝飛時滿背純赤或云卽黃鶴也峽中蚯蚓之盛無如雲安

又如多大石岸有一石長里許者

萬州

晨炊維下岩晚酌檣南浦波心照州榜雲脚響衙
鼓前山如屏牆得得正當戶西江朝宗來循屏復
東去官曹倚巖栖市井喚船渡瓦屋仄石磴猿啼
鬧人語剔核杏餘酸連枝茶贖苦窮鄉固瘠薄陋

俗亦寒窶

土人賣杏皆先剔其核又土茶甚苦

營營謀食艱寂懷

輒訴昔聞吏隱名今識吏隱處

橫溪驛感懷

行遍天涯與地隅筋骸那比十年初朱顏有酒且
留住白髮無方能掃除未得歸田先作賦專攻種
樹已成書祇今飛到南山下猶解清晨出荷鋤

午夜登蟠山

瘴暑嚴夜裝乘涼躡危橋猿依黑林號鬼閃青炬
嘯驚鳥動危葉吟蟲滿荒草泉聲遠相隨山色近
如杳夢猶風燈前身已雲木杪浮生固有沒遠道

何時了豈惟失寢興亦自倒昏曉恭惟天心仁頗
議民力稿我懷漢制詔來尉蜀父老熙如春臺登
沃若時雨膏須知簡書急勿厭蓐食早但勤筆力
淬時助詩腸攪

峽石鋪

萬州至此山頂皆有長石如城壁

峰形壁立偉天造萬雉石城如帶繞山骨鱗皴火
種難山下流泉卻安稻新秧一綠茅花先
秋雪揉風后皇嘉種不易熟野草何為攙歲功

蟠龍嶺

夸陸至胸復嶺苦綠亂初程尚勇在少日還委

頓安得長劍揮盡剗曼嶂斷雖云北山愚聊快南
冥運此意竟蕭索勞歌謾淒曼日日望平陸念念
到彼岸人言束馬險但欠蟠龍峻摧頽強弩未閔
勉焚舟戰譬如已償逋猶有未折券山根治曉裝
峰頂寄朝飯稍脫虬瘴染還探虎窠翫性命乃可
憂筋力何足算

蟠龍瀑布自山頂汗漫淋漓分數道而下望
之宛從天降當爲城中布水第一
銀漢來從左界天大風吹浪落蒼巔人間只見秩
田潤喚作蟠龍洞裏泉

峰門嶺遇雨泊梁山

窮鄉誰與話悲酸駐馬看雲強自寬酒力無端妨
宿病詩情不淺任塵官虎狼地僻炊烟晚風雨天
低夏木寒行盡峰門十萬丈梁山鼓角報平安

耶郊驛大雨

暮雨連朝雨長亭又短亭今朝騎馬泊平日繫船
聽竹葉垂頭碧秧苗滿意青農疇方可望客路敢
遲寧

墊江縣

青泥沒髀僕頭驚黃漲平橋馬不行舊雨雲粘新

雨至高田水入下田鳴百年心事終懷土一日身
謀且望晴休入忠州爭米市暝鴉同宿墊江城

巾子山又雨

百日籃輿困跼踟三晨泥坂兀躋攀晚晴幸自墊
江縣今雨奈何巾子山樹色於人殊漠漠雲容憐
我稍班班如今只憶雪溪釣乘興而來興盡還

鄰山縣

山頂噓雲黑似烟修篁高柳共昏然鳥啼一夜勸
歸去誰道東川無杜鵑

沒水舖晚晴川出曉復大雨上漏下濕不堪

其憂

晚色熹微暖似薰兒童歡喜走相聞無端星月照

濕土依舊山川生雨雲

吳諺曰星月照濕土
明朝依舊雨每驗

旅枕

夢寒泠屋漏征衫潮潤冷爐薰快晴信是行人願
又恐田家暴背耘

金山嶺

阪峻身頻偃崖溪首屢回雲浮平地出路拂半天
來但閱關山道都忘歲月催湘南初上馬猶插早
春梅

明日至鄰水又雨

昨日方無雨今朝又不晴滿山皆屐齒隨處有泉
聲頗怪陰霖甚應催老病成泥塗千騎士與我共
勞生

殘夜上峰頂上

片月挂高嶺我行至其巔舉手欲攬擷恐驚乘鸞
仙霏霏桂香動肅肅露脚寒北斗已到地南斗猶
欄干但聞浮黎音來從始青天大星與之俱曉色
明旂旛素烟渺陸海中有人所寰想見地上友咨
明膏火煎星落玉宇白日生綺霞丹水輪未肯去
相忘尙團圓

望鄉臺

千山已盡一峰孤立馬行人莫疾驅從此蜀川平
似掌更無高處望東吳

早晴發廣安軍晚宿萍池村莊

夜雨洗煩蒸曉風薦清穆雲頭墮鐵山日脚迸金
瀑暑塗一日涼遠客萬事足羈人正奔波觀者何
陸續翠蓋立嚴妝青裳行跣足俗陋介南徼物華
入東蜀竹萌苦已青荔子酸猶綠修廬密成籬直
栢森似纛泥乾馬蹄鬆路坦亭堠速暮投何人莊
窗戶暗修竹

巴蜀人好食生蒜臭不可近頃在嶠南其人
好食檳榔合蠣灰扶留藤一名萋藤食之輒
昏然已而醒快三物合和唾如膿血可厭今
來蜀道又爲食蒜者所薰戲題
旅食諳殊俗堆盤駭異聞南餐灰薦蠣巴饌菜先
葷幸脫萋藤醉還遭葫蒜薰絲萋鄉味好歸夢水
連雲

嘉陵江過合州漢初縣下

井徑東川縣山河古合州木根拏斷岸急雨沸中
流關下嘉陵水沙頭杜老舟江花應好在無計會

江樓

新晴行鄴水上與涪江相近

泥初乾雨不落日色未出暑先薄畏途得晴天
復真是腰錢更騎鶴渾渾鄴水流未平悄悄涪
江如鏡清過盡江沙穿麥隴忽有青蚶扶葉鳴

小溪縣

麥千平壠橫槎一小溪梓花紅綻碎粟穗綠垂
低村婦猶多跣山猿遂少啼東州雖已過錦里尙

雲西

茸山道中感懷

侍臣筆橐舊西班大將麾幢又百蠻挂席南箕宿
昔事閃旂東井何時還日增衰病復一日山隔舊
遊知幾山倦拂盤陀蒼石坐歸心聊與石俱頑

曉發飛鳥晨霞滿天少頃大雨吳誤云朝霞
不出門暮霞行千里驗之信然戲記其事

朝霞不出門暮霞行千里今晨日未出曉氣散如
綺心疑雨再行眼轉雲四起我豈知天道吳農諺
云爾古來占霞電說者類恢詭飛雲走羣羊停雲
浴三豨月當天畢宿風自少女起爛石燒成香汗
礎潤如洗逐婦鳩能拙穴居狸有智蜉蝣強知時

與聞計蛭鳴東山鶴堂審南柯蟻或如陰石
鞭或議陽門閉或云逢庚變或自換甲始刑鵝與
象龍聚訟非一理不如老農諺響應捷如鬼哦詩
敢夸博聊用醒午睡

婺江黃昌倫敘五校字

范石湖詩集卷之十一

終

范石湖詩集卷之十二

婺源黃昌衢康謠叅訂

宣城袁啓旭士旦校閱

九月十九日衙散回留大將及幕屬飲清心
堂觀晚菊分韻得譟字

甲光射曾雲雨腳不敢到西山明古雪秋日一竿
照先偏井絡密後拒參旗棹分弓滴博平鳴劍伊
吾小君看天山箭狐兔何足了開邊吾豈敢自治
有餘巧歸來翠帷卷聊共黃花笑雖無落帽風亦
復接離倒餘閒校筆陣刻燭龍蛇掃毛錐乃更勇

范石湖詩集
我亦鼓旗謀

冬至日銅壺閣落成

走徧人間行路難
異鄉風物雜悲歡
三年北戶窗邊授
萬里西樓雪外寒
已辨鬢霜供歲籥
仍拚髀肉了征鞍
故園雲物知何似
試上東樓直北看

十二月十八日海雲賞山茶

追趁新晴管物華
馬蹄鬆快帽簷斜
天南臘盡風晞雪
下春來水漱沙
已報三林催市柳
仍從掌故問山茶
豐年自是懽聲沸
更着牙前畫鼓搗
雨後東郭排岸司
申梅開方及三分
戲書小

絕令一面開燕

雨入南枝玉蘂皴
合江雲冷凍芳塵
司花好事相邀勒
不著笙歌不肯春

鞭春後雨

旛勝絲絲雨
笙歌步步塵
一年新樂事
萬里未歸人
雲薄竟慳雪
酒濃先受春
送寒東作近
慚愧耦耕身

綠萼梅

朝罷東皇放玉鸞
霜羅紗薄綠裙單
貪看修竹忘歸路
不管人間日暮寒

玉茗花

折得瑤華付與誰
人間鉛粉弄粧遲
直須遠寄驂鸞客
鬢腳飄飄可一枝

張正字母夫人朱氏挽詞

蘋藻儀邦媛
詩書了歲華
籬金寧遺子
羣玉竟傳家
厚施心無斃
浮生自有涯
空餘報恩子
三載亦苴麻

十二月二十四日西樓觀雪

一夜珠簾不下鈎
徹明隨雪上西樓
瑤池萬頃峴崙近
玉疊千峰滴博收
已報春迴南畝潤
從教寒

勒北枝愁四筵
都為豐年醉錄事
何須較酒籌

丙申元日安福寺禮塔蓋成都一歲士女大

集燃香挂旗以禳兵火之災

嶺梅蜀柳笑人忙
歲歲椒盤各異方
耳畔逢人無

魯語蜀人鄉音極難解其為京洛者輒謂之口語或是僭偽時以中國自居循習至今不改也

既又諱之改作魯語尤可笑姑就用其字鬢邊隨我是吳霜
新年後飲

餘蘇酒故事先燃窰堵香石笋新街好行樂與民

同處且逢場

初三日出東郊碑樓院故事祭東軍因宴此

院蜀人皆以是拜掃

范石湖詩集三
遠柳新晴暝紫煙小紅吹凍舞清漣紅塵一闕人
歸後跼跼饑鳶蹙紙錢

郊外鬪驍騎剪柳

千騎同瞻白羽揮驚塵一闕響金■不知掣電彎
弓過但覺柳梢隨箭飛

初四日東郊觀麥苗

去歲秋霖麥下遲臘殘一雪潤無泥相將飽喫滹
沱飯來聽林間快活啼

櫻桃花

借暖衝寒不用媒勻朱勻粉最先來玉梅一見憐

癡小教向傍邊自在開

再去東郊

晚景憎年慣官身作客諳大都緣偶熟豈是性能
堪昔者開三徑他時老一龕越溪觀種竹筠筠綠想
麩麩

三月二日北門馬上

新街如拭過鳴騶芍藥酴醾競滿頭十里珠簾樓
閣上少城風物似揚州

上巳前一日學射山萬歲池故事

北郊征路記前迴三尺驚塵馬踏開新漲忽明多

病眼好風如把及時盃青黃麥壠平平去疎密橙
林整整來游騎不知多幾許長堤十里轉輕雷

上巳日萬歲池坐上呈程詠之提刑

濃春酒暖絳烟霏遠水天平雪浪遲綠岸翻驅如
北渚紅塵躍馬似西池麥苗剪剪嘗新麪梅子雙
雙折舊枝試比長安水邊景祇無饑客爲題詩

新作錦亭程詠之提刑賦詩次其韵

飛鴻銜子漫紛紛萬里西遊始識真不管吳霜微
點髮來看蜀錦爛爭春倚欄定有司花女秉燭仍
留上夜神異縣賞心誰與共故人新作坐中賓

小築聊鋤草棘荒遊人錯比召南棠花邊霧髮風
鬟滿酒畔雲衣月扇香燦爛吟牋煩索句淋漓醉
墨自成行報章遲鈍吾衰矣終日冥搜謾七襄

錦亭燃燭觀海棠

銀燭光中萬綺霞醉紅堆上缺蟾斜從今勝絕西
園夜壓盡錦官城裏花

寶相花

誰把柔條夾砌栽壓枝萬朵一時開爲君也著詩
收拾題作西樓錦被堆

三月二十二日海雲模石

勸耕亭上往來頻四海萍浮老病身亂插山茶猶
昨夢重尋池石已殘春驚心歲月東流水過眼人
情一闕塵賴有貽牟堪飽飯道逢田峻且眉伸

四月十日出郊

約束南風徹曉忙收雲捲雨一川忙漲江混混無
聲綠熟麥騷騷有意黃吏卒遠時閒信馬田園佳
處召思鄉隣翁萬里應相念春曉不歸同插秧

納涼

雨洗新秋夜氣清悴肌無汗葛衣輕畫簷分月下
西壁絡緯飛來庭樹鳴

西樓獨上

竹日駐微暑松風生早秋閒尋來處路獨倚靜中
樓老景驅雙轂鄉心挽萬牛相隨水上坐腳底亦
雲浮

曉諧三井觀

路轉市聲遠寬間古城東適從紅塵來
蒼烟
叢檜心傾穠露芋葉翻微風秋陽澹籬落殘暑不
必攻野老熟睡起日高首如蓬官身騎官馬君應
笑龍鍾

曉起

點鼠緣鈴索饑鴉啄井欄不眠秋漏近多病曉屏
寒咄咄渠何怪休休我自闌牙門朝日上簫鼓報
平安

舫齋晚憩

心作萬緣起境生千劫忙誰同油幕靜獨對篆烟
長有盡天魔力無窮海印光雨餘弦日上塵累本
清涼

秋雨快晴靜勝堂席上

一笑憧憧鴈鷺行簿書堆裏賦秋陽心如墜絮沾
泥懶身似飛泉激石忙雨後蹲鴟先稻熟霜前浮

蟻鬪棖香天涯節物遞愁眼且復隨鄉便入鄉

新涼夜坐

吏退焚香百慮空靜聞蟲響度簾櫳江頭一尺稻
花雨窗外三更蕉葉風日日老添明鏡裏家家涼
入短檠中簡編燈火平生事雪白眇昏柰此翁

秋老四境雨已沛然晚坐籌邊樓方議祈晴
樓下忽有東界農民數十人訴山田卻要雨
須長吏致禱感之作詩

晚歲羈懷有所思秋來病骨最先知鏡中公案已
甘老紙上課程休諱癡西堰頗聞江漲急東山猶

說雨來遲錦城無事知多少憂旱憂霖蹙盡眉

西樓夜坐

抗塵懷抱若爲寬繞屋蛙聲亦在官巖桂無香秋
遂晚江鱸有約歲將寒文書散亂嘲癡絕燈火淒
清語夜闌病倦百骸非復我但思禪板與蒲團

立秋月夜

已放新涼入簟紋更驅餘溽避爐熏穿雲竹月時
時見咽露莎蛩院院聞稍喜雪山無斥候但虞烟
驛有移文行藏且付蘧蘧夢明發還親鴈鷺羣

前堂觀月

箕踞繩床政自豪遠遊何暇讀離騷蕭森萬竹秋
逾瘦突兀雙楠夜更高東郭風喧三鼓市西城石
洶二江濤色塵聲界如如現本自無禪不用逃

有懷石湖舊隱

浩蕩沙鷗久倦飛摧頽櫪馬不勝鞿官中風月常
虛度夢裏關山或暫歸橘杜十年霜欲飽鱸江一
雨水應肥冷雲著地蒲塘晚誰爲披蓑暖釣磯

太平瑞聖花

雪外捫參嶺烟中濯錦洲密攢文杏蘂高結綵雲
毳百世嘉名重三登瑞氣浮挽春同住夏看到火

西流

無題

聞道明朝送舊官無情更鼓夜將闌此生見面知
何日忍淚須臾子細看

晁子西寄詩謝酒自言其家數有逝者詞意
悲甚次韻解之且以建茶同往

我讀晁子詩十語九慨傷長川日夜逝鬢髮空蒼
浪君家出世學無生亦無亡鄉謂法幢立何乃槁
木僵起滅不滿笑古來其楸行豈其捏目華鮮翳
海印光我酒愧薄薄未能緩愁腸申以春風芽一

淪萬慮忘慧刀儻未割會且掀禪床錦里有逢迎
謹避舍葢堂居然足音足好在故意長啣耳念一
洗遲君鳳鳴岡

早衰不寐

官事拘攣似力田作勞歸晚意茫然按摩合體俱
非我展轉通宵遠似年一叟披衣惟兀坐羣兒得
枕便佳眠人生元是華胥客休向迷塗更著鞭

晚步宣華舊苑

喬木如山廢苑西古溝疎水靜鳴池吏兵窻窳
更後樓閣崔嵬欲暝時有露冷螢猶照草無風驚

崔自遷枝歸來更了程書債目青昏花燭穗垂

西樓秋晚

樓前處處長秋苔俛仰璿杓又欲回殘暑已隨梁
燕去小春應爲海棠來客愁天遠詩無托吏畫山
橫睡有媒晴日滿窗鳧鶩散巴童來按鴨爐灰

明日分弓亭按閱再用西樓韻

眼看白露點蒼苔歲月飛沉首屢回老去讀書隨
忘卻醉中得句若飛來聞雞午夜猶能舞射雉西
郊不用媒自笑支離聊復爾丹心元未十分灰

丁酉重九藥市呈坐客

有序

余于南北西三方皆走萬里皆遇重九每作水調
一闋燕山首句云萬里漢家使桂林云萬里漢都
護成都云萬里橋邊客今歲倦遊甚矣不復更和
前曲乃作此詩以自戲

莫向登臨怨落暉自緣羈宦阻歸期年來厭把三
邊酒此去休哦萬里詩烏帽不辭欹短髮黃花終
是欠東籬若無合坐揮毫健誰解西風楚客悲

會慶節大慈寺茶酒

霜揮催曉五雲鮮萬國驩呼共一天澹澹暖紅旗
轉日浮浮寒碧瓦收烟銜杯樂聖千秋節擊鼓迎

冬大有年忽憶捧觴供玉座不知身在雪山邊
至日天慶觀朝拜雲日晴麗遙想郊祠慶成
作驩喜口號

浙浙霜風不滿旗紫烟黃氣捧朝曦五更貫索埋
光後萬里鉤陳放仗時甯滯月南無舊事布宣漢
德有新詩豐年四海皆温飽願把驩心壽玉卮
十一月十日海雲賞山茶

門巷驩呼十里村臘前風物已知春兩年池上經
行處萬里天邊未去人客鬢花身俱歲晚山光酒
色且時新海雲橋下溪如鏡休把冠巾照路塵

海雲回按驍騎于城北原時有吐蕃出沒大
渡河上

古道風沙卷夕霏小江烟浪皺春漪天于麥壠猶
慳雪人向梅梢大欠詩頓轡青驪飛脫兔離絃白
日嘯寒鴟牙門列校俱剽銳檄與河邊禿髮知

合江亭隔江望瑤林莊梅盛開過江訪之馬
上哦此

何處春能早疎籬限激湍竹間烟雪迴馬上晚香
寒喚渡聊相覓巡簷得細看極知微雨意未計日
烘殘

新作官梅莊移植大梅數十本繞之

臘前催喚主林神玉樹飛來不動塵契濶西湖慚
處士飄零東閣似詩人一天午夢空花碎滿地春
愁月影新掃淨宣華藜藿徑他年誰記石湖濱

丁酉正月二日東郊故事

椒盤宿酒未全醒擾擾金鞍逐畫駟麥雨一犁隨
處綠柳烟千縷幾時青客愁舊歲連新歲歸路長
亭間短亭萬里松楸雙淚墮風前安得諱飄零

二月十七日病後始能扶頭

複幕重簾苦見遮暮占栖雀曉占鴉殘燈煮藥看

成老細雨鳴鳩過盡花心爲蚤衰元自化髮雖無
病已先華更蒙癘鬼相提唱此去山林屬當家

病中聞西園新花已茂及竹筵皆成而海棠
亦未過

梅嶼桃溪聽竹初三句高卧信音疎春雖與病無
交涉雨莫將花更破除祗合蘧蘧隨夢去何須咄
咄向空書頗聞蜀錦猶相待去歲今朝已雪如

枕上

一枕經春似宿醒三衾投曉尙凄清殘更未盡鴉
先起虛幌無聲鼠自驚久病厭聞銅鼎沸不眠惟

望紙窗明摧頽豈是功名具燒藥爐邊過此生
初履地

扶頭今日彊冠簪餘燼收從百戰酣長脛閣軀如
瘦鶴衝風奪氣似枯枿客來備■懶殘淚老去定
同彌勒龕何處更能容結習任教花雨落麤麤

密室憊坐

如許頭顱莫振矜但尋曲几與枯藤餘生不直一
彈指此病寧論三折肱何處丹房癡候火誰家籌
室彊傳燈本來識字耕夫耳今歲仍添百不能

春晚初出西樓

試倚枯藤似繭雲堂堦微步小逡巡忽逢巖桂新
抽紫屈指黃紬睡一春

春晚卧病故事都廢聞西門種柳已成而燕

宮海棠亦爛熳矣

新窗淡窈似禪房竟日虛明裊斷香詩債無邊春
已老睡魔有約晝初長市橋烟雨應宮柳墟苑池
臺自海棠游騎行歌莫相笑遨頭六結已龜藏

病起初見賓僚時上疏丐祠未報

浪將冠服衣猿狙因病偷閑稍自如時有好懷誇
得句略無情語怕回書邊城晏閉稀傳箭村巷春

遊未荷鋤追此良辰公事少天恩儻許賦歸歎
陸務觀云春初多雨近方晴碧雞坊海棠全
未及去年

遲日溫風護海棠十分顏色醉春粧天公已許晴
教好說與鳴鳩一任忙

報事碧雞坊裏來今年花少似前回笙篁冷落遨
頭病不著梁州打不開

清明日賦新火作牡丹會

蜀人以洛中千葉種爲京花單葉爲

川花

再鑽巴火尙浮家去國年多客路賒那得青烟穿

御柳且將銀燭照京花香鬟半醉斜枝重病眼全
昏瘴霧遮錦地繡天春不散任教簷雨捲泥沙

三月十九日極冷

誰勒餘寒不放迴春深猶暖地爐灰鄉心忽向燈
前動夜雨先從竹裏來鷓鴣已如鶯百轉醪醑那
復雪千堆調糜煮藥東風老慚愧茶甌與酒杯

垂絲海棠

春工葉葉與絲絲怕日嫌風不自持曉鏡爲誰粧
未辨沁痕猶有淚燕脂

浣花戲題爭標者

凌波一劇便捐生得失何曾較重輕蝸角虛名人
尙愛錦標安得笑渠爭

鹿鳴宴

岷峨鍾秀蜀多珍坐上儒先更逸羣墨沼不憂經
覆瓿琴臺重有賦凌雲文章小技聊干祿道學初
心擬致君富貴功名今發軔願看稽首策高勳
陸務觀作愁曲悲甚作詩反之

東風本是繁華主天地元無著愁處詩人多事惹
閑情閉門自造愁如許病翁老矣癡復頑風前一
笑春無邊槽床夜鳴如落泉一杯正與人相關一

種竹了題愛山亭

灑掃宣華舍此君烟中月下綠生塵他年葉葉清
風滿莫怨今年借宅人

題錦亭

手開花徑錦成窠浩蕩春風載酒過來歲遊人應
解笑甘棠終少海棠多

初發太城畱別田父

秋苗五月未入土行人欲行心更苦路逢田翁有
好語競說宿來三尺雨行人雖去亦伸眉翁皆好
住莫相思流渠湯湯聲滿野今來醉飽雞豚社

入崇寧界

桑間三宿尙回頭何況三年濯錦遊
草草陴筒中酒處不知身已在彭州

懷古亭

朝來寫得故人書雙鯉難尋鴈亦無
付與離堆江水去好從陴縣到成都

離堆行

此江有兩岸中斷相傳秦李太府鑿

官致祭謂之攝水無不應民祭賽者卒以羊

殘山狼石雙虎卧斧跡鮮皴中鑿破潭淵油油無
敢唾下有猛龍踰鐵鎖自從分流注石門西州杭

稻如黃雲剗羊五萬大作社春秋伐鼓蒼烟恨我
昔官稱勸農使年年來激西江水成都火米不論
錢絲管相隨看蠶市款門得得酌清尊椒漿桂酒
荆羶葷志欲一語神豈聞更願愛羊如愛人

崇德廟

雪山南風融雪汁化作岷江江水來不知新漲高
幾重但覺樓前奔萬雷天教此水入中國兩山辟
易分道開我家長川到海起卻在發源傳酒杯人
生幾屐辦此役遠遊如許神應哈東歸短棹昨已
具明日發船撾鼓催灘平放溜日千里已夢鱸

如雪堆丹楓繫纜一回首玉壘浮雲安在哉

戲題索橋

織簾勾舖面排繩彊架空染人高曬帛獵戶遠張
量薄薄難承雨翻翻不受風何時將蜀客東下看
垂虹

青城山會慶建福宮

宮舊名丈人觀予為請
于朝賜今名入山前數
日勅書至自行在予就設醮以祝聖壽云

墨詔東來洵驛傳璇題金榜照山川祥開聖代千
秋節響動仙都九室天觸石湧雲埋紫邏流金飛
火燭蒼巔祇應老宅廳眉客長記新宮錫號年

老宅

即老人
村也

再題青城山

萬里清遊不暇慵雙旌換得一枝筇來從井絡直
西路上到江源第一峰海內閑身輸我佚山中佳
氣為人濃題詩試刻巖前石付與他年蘇暈重

玉華樓夜醮

青城觀殿前大樓制作瑰麗羽
衣云常有火炬出殿後峰上予
默禱之果現衆共觀之

丈人峰前山四周中有五城十二樓玉華山宮居
上頭紫雲傾千柱浮剛風八面寒颼颼靈君晏
坐三千秋躡符行飛戲元洲下睨濁世悲蜉蝣桂

旗偃蹇澹少休知我萬里遙相投暗蛭奏樂鏘鳴
球浮黎空歌清夜道叅旗如虹欲下流化為神燈
燭巖幽火鈴洞赤凌空遊誰欲蔽虧黯然收禱之
復然為我畱半生縛塵鷹在鞴豈有骨相肩浮丘
山英發光洗羈愁行迹未遠夫何尤笙簫上雲靈
欲旂揖我從之驂素虬

上清宮

歷井捫參興未闌丹梯通處更躋攀冥濛蜀道一
雲氣破碎岷山千髻鬟但覺星辰垂地上不知風
雨滿人間蝸牛兩角猶如夢更說紛紛觸與蠻

最高峰望雪山

大面峰頭六月寒神燈收罷曉雲班浮空忽湧三
銀闕云是西天雪嶺山

范氏莊園

東閣梅
悠然自詩思驚風入午暑水竹有秋
意采菱不盈掬興與蓴鱸會遙知新津宿魂夢亦
清麗

新津道中

雨後郊原淨村村各好音宿雲浮竹色清溜走檜
陰曲沼擎青蓋新畦執綠針江天空濶處不受暑

光侵

次韻陸務觀編修新津遇雨不得登修覺山

經過眉州三絕

送客多情難語離僕夫無情車載脂平生漂泊知何限少似新津風雨時

離合紛紛怕遠遊遠遊仍怕賦登樓何須一望三千里望盡西州轉更愁

雨後暮願山色開玻璃江清已可杯綠荷紅芰香四合又入芙蓉城裏來

中巖

赤巖倚鈴嶰翠邏森成削岑蔚嵐氣重稀聞暑光薄聊尋大士處往扣洞門鑰雙撐紫玉關中蠹翠雲幄應供華藏海歸坐寶樓澗無法可示人但見雨花落不知龍湫勝何似魚潭樂夜深山四來人靜天一握驚看杯挂白月影到林壑門前六月江世界塵漠漠寶餅有甘露一滴旣煩濁捫天援斗杓請爲諸君酌

去眉州一程諾詎羅尊者道場相傳昔有天臺僧遇雨僧與之木鑰

匙云異時至眉州中巖扣石笋當再相見後果然今三石屹立如樓

慈姥巖與送客酌別風雨大至涼甚諸賢用中巖韻各賦餞行詩紛然襞牋清飲終日雖

無絲竹管絃而情味有餘

山靈知我厭塵土喚起蟄雷塵午暑松風無力雨
絲長散作純純雪塵舞巖前懸溜珠簾傾安得吹
來添玉觥詩成酒盡腸亦斷休喚佳人歌渭城

次韻陸務觀慈姥巖別二絕

送我彌旬未忍回可憐蕭索把離杯不辭更宿中
巖下投老餘年豈再來

明朝真是送行人從此關山隔故情道義不磨雙
鯉在蜀江流水貫吳城

次韻代荅劉文潛司業二絕

半羗江上首空回慈姥巖前定把杯縱使百腸都
忘卻也應風雨送愁來

面廊月下短歌行惟有知音解有情一曲紅窗聲
裏怨如今分作兩愁城

玻璃江一首戲劾陸務觀作

玻璃江頭春綠深別時沄沄流到今祇言相遠易
排遣不道相思翻苦心烏頭可白我可去菖花易
青君易尋人生若未免離別不如碌碌無知音

余與陸務觀自聖政所分袂每別輒五年離
合又常以六月似有數者中巖送別至揮淚

失聲畱此爲贈

官塗流轉幾沉浮雞黍何年共一丘動輒五年遲
遠信常于三伏話羈愁月生後夜天應老淚落中
巖水不流一語相門仍自解除書聞已趣刀頭

萬景樓

左披九頂雲右送大峨月殘山剩水不知數一一
當樓供勝絕玻瓈濯錦遙相通指麾大渡來朝宗
川靈胥命各東去我亦順流呼短篷詩無傑語慚
風物賴有丹青傳小筆仍添書客倚欄看今與山
川相映發龍彎歸路遶烏尤棟雲簾雨邀人畱若

爲喚得涪翁起題作西南第一樓

在漢嘉城中山上登覽勝絕殆

冠西川

凌雲九頂

即大石佛處初登山時岩壁悉刻爲小佛

聊爲東城載酒遊萬龕迎我到峰頭江搖九頂風
雷過雲挾三峨日夜浮古佛臨流都坐斷行人識
路亦歸休酣酣午枕眠方丈一笑閑身始自由

戲題方響洞

漢嘉廣福院中水洞有聲琅然莫知其所在舊名丁東水

隔凡水澗不可越衆真微步壺中月徙倚含風玉
佩聲何須聽作蕤賓鐵

問月堂酌別

半明燈火話悲酸此會情知後會難四海宦遊多
聚散一生情事足悲歡鬢絲今夜不多黑酒量徹
明無數寬醉夢登舟都不記但聞風雨滿江寒

別後寄題漢嘉月榭

陸務觀所作太白峩
眉山川之語

隱吏詩情卜築幽同年惜別勸淹留試傾萬景湖
亭酒來著半輪江月秋川路雖長猶共此夜船空
載且歸休碧巖勝處頻回首好事誰能更小樓

過燕渡望大峨有白氣如層樓拔起叢雲中
圓野千山暑氣昏大峨烟靄亦繽紛玉峰忽起三
千丈應是兜羅世界雲

蘇稽鎮客舍

送客多回我獨前何人開此竹間軒灘聲悲壯夜
蟬咽併入小窗供不眠

癸江黃昌偁元之校字

范石湖詩集卷之十二

終

范石湖詩集卷之十三

婺源黃昌衢康誥叅訂

宣城袁啓旭士旦校閱

岷眉縣

窮鄉未省識旌旄
雞犬驩呼巷陌騷
村媪聚觀行
漬布野翁迎拜跽
然蒿泉清土沃稻
芒早縣古林
淡槐癭高珍重里
儒來獻頌盛言千
載此丘遭

初入大峨

烟霞沉痼不須醫
此去真同汗漫期
曾欵上清臨
大面仍從太白問
峨眉山中緣法如
今熟世上功

名自古癡賸作畫圖歸挂壁他年猶欲卧遊之

華嚴寺

衆峰攢壁立中有路一綫板援白雲梯食頃已天
半我本紫芝曲誤落青芻棧向來脫新羈恍已還
舊觀花烟辭少城暑雪對大面來從太白西更走
三峨徧風生兩腋輕泉吼四山眩今晨第一程莫
嘆輿僕倦

中峰

茂真尊者舊菴在峰下相傳孫思邈與
茂真相呼而應

凌高蹋危峰斗下頰幽谷仙英馥椒蘭嘉陰轟旄
纛空翠元不雨洩雲自膏沐暑浴森有稜瘁肌婁

欲粟白崖如負依金界莫蒼麓衆峰拱二八娟妙
澆重屋真人與尊者幽居接松竹呼之儻肯應雷
我試殮玉

雙溪

在白水寺前僧云此景猶在廬山三峽
馬蕩龍湫之上溪中常有五色光相

冷風騷騷木葉低洞淵阻澗生怪奇碧琳雙澗黑
無底中有玉龍相對飛雷轟雪捲入林樾化爲一
龍潭底沒摩尼鬪罷四山空時有寶花巖下發

寶現溪

三藏自西域歸過溪見兩石闕攬得
其一今藏西水寺

祭祭罨畫沙鱗鱗翹塵水朝陽相發揮光景艷孔
翠寧問雙溪號但見縠紋細神魚不謀食終日印

潭底躍珠本具根聊共阿師戲收藏更傳寶一笑
落第二

點心山

入山窮宿雨上山賀朝霽跬步便歷險轉盼已呀
氣豈惟膝點心固已頭搶地遊人貪勝踐姑吟蜀
道易

大扶拐

身如魚躍上長竿路似鏡中相對看珍重山丁扶
我過人間踽踽獨行難

小扶拐

食時方了大扶拐前逢仄徑仍崎嶇懸崖破棧不
可玩輿丁挾我如騰狙半生行路險艱足如今雪
鬚應難綠卻憐苔髮鎮長青千古鬢髮挂高木

糊孫梯

峽裏有糊孫愁子嘗遇之

木磴鱗鱗滑帶泥微生欹側寄枯藜糊孫愁處我
猶過箇裏如今幸有梯

雷平湖

大旱以死彘及婦人弊履投之雷雨
即至

行人魄動風森森兩崖奔黑怒太陰不知七十二
洞處側足下窺雲海淡聞有神龍依佛住棖觸須
更召雷雨西川稻熟須好晴我亦閑遊神勿驚

八十四盤

冥鴻無伴鶴孤飛回首塵籠一笑嬉八十四盤新
拄杖萬三千乘舊牙旗石梯碧滑雲生後木葉紅
斑雪霽時說與同行莫惆悵人間捷徑轉欽巖

婆羅平

仙聖飛行此是家路逢真境但驚呀神農嘗外盡
靈藥天女散餘多異花嵐雨遍衣寒似鐵冰泉炊
米硬于沙峰頭事事殊塵世缺甃跳梁笑井蛙

思佛亭曉望

栗烈剛風刮病眸登臨何啻緩千憂界天暑雪青
城外湧地晴雲瓦屋頭浩蕩他年誇北客蒼茫何
處認西州千巖萬壑須尋徧身是江湖不繫舟

光相寺

峰頭四時如大冬芳花芳草春自融苔痕新晞六
月雪木勢舊偃千年風雲物爲人布世界日輪同
我行虛空浮年元自有超脫地上可憐悲撻蓬

七寶巖

天如空玉甌下覆白玉盤晶光眩相對我獨居兩
間正視不勝瞬卻立聊少安但覺風浩浩骨毛森
以寒神仙杳無處寧論有塵寰身輕一稿葉兩腋

如飛翰同行挽我衣何往可當還少畱作詩去奇
哉此憑欄

淳熙四年六月二十七日登大峨之巔一名
勝峰山佛書以爲普賢大士所居連日光相
大現賦詩紀實囑印老刻之以爲山中一重
公案

勝峰高哉虜紫青白鹿導我登化城住山大士喜
客至兜羅布界續相迎圓景明揮倚雲立艷如七
寶莊嚴成一光未定一光發中有墨像隨心生白
毫從地插空碧散燭象緯天龍驚夜神受記亦修

供照世洞然千百燈明朝銀界混一白咫尺眩轉
寒凌兢天容野色儻開閉慘澹變化愁仙靈人言
六通欲大現洗山急雨如盆傾重輪疊采印巖腹
非烟非霧非丹青我與化人中其任鏡光覲面交
相呈前山忽湧大圓相日圍月暈浮青冥林泉草
木盡含裏是則名爲普光明言詞海藏不勝讚北
峰復有金橋橫衆慈久立佛事竟一塵不起山岭
嶢向來無法可宣說爲問有耳如何聽我本三生
同行願隨緣一念猶相應此行且復印心地衣有
寶珠奚外營題詩說偈作公案亦使來者知吾曾

神通佛法須判斷一任熱椀春雪鳴

孫真人菴

何處仙翁舊隱居青蓮巉絕似蓬壺雲淡未到淘
朱洞雨小先尋鍊藥爐澗下草香疑可餌林間虎
伏試教呼閑身儘辦共薪水定肯分居一半無

龍門峽

插天千丈兩碧城中有玉塹穿巖扃瀑流懸布不
知數亂落嵌根飛白雨瑤琨爲室雲爲關龍君所
居朱夏寒不辭擊棹更深入萬一龍驚雷破山

既離成都故人送者遠至漢嘉分袂其尤遠

而相及于峨眉之上者六人范季申郭中行

楊尙卿嗣勳李良仲譚德稱口占此詩畱別

我本住林屋風吹來錦城錦城亦何樂所樂多友

生相從不知久相送不計程橫絕峨眉巔欲去有

餘情吾宗蓋難弟李郭人中英二楊懿文德譚子

貧粹清相視心莫逆劇談四筵傾明朝各回首雲

水相與平我今投紱去行且扶犁耕淒涼別知賦

慷慨結客行後會豈不好路長恐寒盟諸賢乃不

凡骨相有功名大厦罩羣木明廷朝萬靈王畿坦

如砥結綬當同登道傍石湖水誰能叩柴荆夢中

倘相見秉燭聽殘更
請佛閣晚望雪山數十峰如爛銀晃耀黍光

中

累塊蒼然是九州大千起滅更悠悠雪光正照天
西角日影長浮雨上頭峰頂何曾知六月塵間想
已別三秋佛毫似欲畱人住橫野金橋晚未收

淨光軒 白水寺

銷盡八窗明雨竹風泉演妙聲身世只今高
幾許北峰渾共倚欄平

虎溪

水本無心作浪波徑行偶與石相磨不須更問橋
安否喚取於菟載我過

白雲峽

雙溪疑從銀漢下我欲窮源問仙舍飛瀾濺沫激
籃輿卻望兩岸天一罅疎疎暑雨滑危梯策杖山
風掖高駕尋幽險絕太奇生莫笑退之號大華

犍爲江樓

河邊堵立看歸蓬三老開頭暮欲東漲水稠灘連
峽內淺山浮石似湘中無人驛路榛榛草有客江
樓浩浩風種落塵消少公事賸裁新語寄詩筒

縣令

師永錫同年能詩

宣化道中

瘦草蕭疎已似秋盤陀山骨束江流兩崖若不頑如鐵爭得狂瀾拍岸休

將至敘州

亂山滿平野漲水豪大川仄徑無轍跡疎林有吹烟山農且燒畚蠻賈暑荷甌窮鄉足荒慳打鼓吹我船

七夕至敘州登鎖江亭山谷謫居時屢登此亭有詩四篇敬用其韻

水口故城丘壘平新亭乃徂有鐵橫舊成州在對江山趾下臨

馬湖蠻江路蠻自江出必過城下故實鎖以為限今遷城過江已失形勝而猶于亭下鎖江持以攔稅而已非本旨也歸艤擊鼓若飛渡一雨徹明秋漲生東

樓鎖江兩重客筆墨當代俱詩鳴我來但醉春碧酒星橋脉脉向三更

江安道中瀘成之間有渡瀘亭不知孔明竟出何路今鎖江對岸廢城下臨馬湖有韋臯紀功碑疑此或是古跡

穠綠連村荔子殘瘴雲將雨暗前灣漲旗且喜三灘駛叱馭曾驚九折艱瀘水再開迷古渡馬湖碑缺伴荒山威名功業吾何有無事飄飄犯百蠻

瀘州南定樓

歸艤東下興悠哉小住危欄把一杯樓下泔泔內
江水明朝同入大江來

題譚德稱扇

蠻風吹雨瘴江肥短草荒山鳥不飛盡是瀘南腸
斷句如今分與故人歸

題楊商卿扇

君歸我去兩消魂愁滿千山鎖瘴雲後夜短檠風
雨暗誰能相伴細論文

題楊子容扇

雙竹軒窗聽讀書垂天雲翼要搏扶與君作只三
年別射策東來過石湖

譚德稱楊商卿父子送余自成都合江亭相
從至瀘南合江縣始分袂水行踰十里作詩
以別

合江亭前送我來合江縣裏別我去江流好令人
好乖明日東西南北路千里追隨不忍歸一杯重
把知何處臨岐心曲兩茫然但祝顛書無別語

發合江數里寄楊商卿諸公

臨分滿意說離愁草草無言祇淚流船尾竹床遮

縣市故人猶自立沙頭
過江津縣睡熟不復梢船

西風扶櫂似乘槎水濶灘沉浪不花
夢裏竹間喧
急雪覺來船底哀鳴沙

恭州夜泊

草山礲礲疆田疇村落熙然粟豆秋
翠竹江村非
錦里青溪夜月已渝州小樓高下依
磐石弱纜西
東戰急流入峽初程風物異布裙跣
婦總垂瘤

大熱泊樂温有懷商卿德稱

暑候秋逾濁江流晚更渾瘴風如火
嵐月似烟

昏城郭廩君國山林妃子園故人新
判袂得句與
誰論

涪州江險不可泊入黔江棧舟

黃沙翻浪攻排亭瀆淖百尺呀成坑
拘窪眩轉久
乃平一渦熨帖千渦生篙師絕叫歐
川靈鳴鏡飛
度如奔霆水從岷來如濁涇夜榜黔
江聊濯纓玻
璿徹底鏡面平忽思短棹中流橫鈞
絲隨風浮月
明

妃子園

涪陵荔子天寶所貢

露葉風枝驛騎傳華清天上一嫣然
當時若識陳

家紫何處蠻村更有園

豐都觀 在豐都縣後三里平都山舊名仙都觀相傳前漢王方平后漢陰長生得

道處陰君上升時五雲從地湧出內王母朝元隊仗尤奇

神仙得者王方平誰其繼之陰長生飄然空飛五
雲輶上賓寥陽留玉京石鑪丹氣常夜明寵光萬
栢森千齡峽山偈仄岷江縈洞宮福地古所銘云
有北陰神帝庭太陰黑簿囚鬼靈自從仙都啓靈
扃明霞流電飛陽晶暉景下墮鑠九冰塞絕苦道
升無形至今臺殿棲玲嶰隋圻唐堊留丹青十仙
怪奇溪女清瑤池仙仗紛娉婷琅璈赴節鏘欲鳴

我來秋暑如炊蒸汗流呀氣扶枯藤摩挲衆蹟不
暇評聊記梗概知吾曾

萬州西山湖亭秋荷尙盛

叢蒼忽明眼山腰灩湖光列岫繞雲錦深林護風
香西山卽大華玉井餘秋芳隔江招岑仙共擘雙
蓮房

下巖

疇昔中巖一夢殘下巖風景亦高寒峽中無處堪
停棹雨後今朝始凭欄不用苦求毫相現祇教長
挂水簾看山僧勸我題蒼壁坡谷前頭未敢刊

范石湖詩集十一
魚復浦泊舟望月出赤甲山山形斷缺如鼉
龍坐而張頤月自缺中騰上山頂

月生赤甲如金盆蹲龍呀口吐復吞長風浩蕩挾
之出影落半江沉復翻天高夜靜四山寂惟有灘
聲喧水門高齋詩翁不可作我亦不眠終夕看

夔門卽事

自東川入路至恭州便有瘦

峽行風物不堪論祥暑驕陽雜瘴氛人入恭南多
附贅山從夔子盡侵雲竹枝舊曲元無調麴米新
芻但有聞試覓清泠一杯水筒泉須是卧龍分

瞿唐行

白鹽赤甲皆峽口大山黃嵌黑石皆
峽中至險處入峽西岸有聖泉舟人

或向之疾呼曰人渴也泉卽迸下一杯許復
乾余舟過甚急未之試也

川靈知我歸有程一夜漲痕千丈生中流擊楫洶
作氣夾峰歛旗呀失聲不知灑灑灑在船底但覺瞿
唐如鏡平鑿峽疏川狠石破號山索飲飛泉驚白
鹽赤甲轉頭失黑石黃嵌攙命輕岸草增肥無泊
處竹枝凝烟空餘情人間險路此奇絕客裏驚心
吾飽更劍閣翻成蜀道易請歌范子瞿唐行

夜泊歸州

舊國風烟古新涼瘴癘清片雲將客夢微月照江
聲細和悲秋賦遙憐出塞情荒山餘閭閻兒女擅

嘉名

秭歸郡圃絕句二首

花竹蕭騷小圃畦官居翻似隱淪棲巴山四合秋
陽滿杜宇黃鸝相對啼

孤城偪仄復偪仄前山後山青欲來市聲蕭條衙
鼓靜惟有叱灘喧萬雷

宋玉宅

悲秋人去話難工搖落空山草木風猶有市人傳
舊事酒鑪還在宋家東

後巫山高一首

余前年入峽嘗賦巫山高今復作一篇十二峰中東西各

一峰最奇不可繪畫左右前后餘峰之可觀者尚多不止十二峰也

窈真宮前十二峰兩峰娟妙翠插空餘峰競秀尙
多有白壁蒼崖無數重秋江漱石半山腹倚天削
鐵荒行蹤造化鍾奇轟瑤巘真靈擇勝探珠宮朝
雲未罷暮雲起陰晴竟日長冥濛瑤姬作意送歸
客一夜收潦仍回風仰看館御飛檝過回首已在
虛無中惟餘烏鴉作使者迎船送船西復東

黃牛峽

朝離悲秋宅午傍疊石磯小畱黃牛廟細讀石馬
詩黃牛隱見蒼山裏石馬至今猶馘耳當年夢境

識山翁馬爲迎門神爲起物生不朽繫所逢歐詞
蘇筆蒼苔封山高水長翁之風石馬亦與翁無窮

假十二峰

巴東三峽數巫陽山人西陵更鬱蒼何以假爲非
確論直疑溟滓第高唐

扇子峽

茲行看山真飽諳今晨出峽仍窮探南磯北磯白
鐵壁千峰萬峰碧玉簪橫前直疑江已斷崛起競
與天相攙蜀山欲窮此盤礴禹力且盡猶鐫剗望
舒宮中金背蟾泥塗脫盡餘老饒下飲岷江不知

去流涎落吻如排髯挈餅犧棹料清甘未暇煮茗
和薑鹽聊將滌硯濡我筆恍忽詩律高巉巖

荆渚中流回望巫山無復一點戲成短歌

千峰萬峰巴峽裏不信人間有平地渚宮回望水
連天卻疑平地元無山山川相迎復相送轉頭變
滅都如夢歸程萬里今三千幾夢卽到石湖邊

魯家湫入沌

過盡巴東巫峽長荆川鼓棹更茫茫避風怕入三
江口乘月貪行百里荒夜後逢人盡刀劍古來有
地皆耕桑可憐行路難如此一簇寒蘆尙稅場

鄂州南樓

誰將玉笛弄中秋黃鶴飛來識舊游漢樹有情橫
北渚蜀江無語抱南樓燭天燈火三更市搖月旌
旗萬里舟卻笑鱸卿垂釣手武昌魚好便淹留

題黃州臨臯亭

夏口風帆赤壁磯雪堂醜酒竹樓棋繫船一日黃
州下祇辦登臨不辦詩

江州庾樓夜宴

岷江漱北渚廬阜窺南窗名山復大川超覽茲樓
雙何必元規塵自足豪宅邦使君秣田熟新涼荔

酒缸落景澹碧瓦長虹吐金■客從三峽來噩夢
隨奔瀧小畱聽琵琶船旂卷修杠請呼裂帛絃爲
拊洮河腔曲終四憑欄倦遊心始降明發挂帆去
曉鐘烟外撞

東林寺

慧遠師白蓮社也傍有樂天草堂對
山絕頂卽天池文殊現燈處

談易繙經宰木春三生猶自裊烟熏客塵長隔虎
溪水劫火不侵香谷雲老矣懶供蓮社課歸哉欣
讀草堂文山頭一任天燈現箇事何曾落見聞

過虎溪對東林蒼巖翠樾下侵大澗宛似靈
隱冷泉囑長老法才作亭名曰過溪且爲率

山丁薤草定基一朝而畢

過溪無限翠屏開大笑從教虎子猜不獨山中添
故事仍教題作小飛來

病倦不能過谷簾三峽寄題

白龍青峽紫烟鑪山北山南只半塗說與同來綠
玉杖他年終補卧遊圖

湖口望大孤

廬阜岡勢斷江流潏相通大孤如小寇插入齋淪
中我欲蛻濁浪往馭揚瀾風晃晃銀色界潏潏水
精宮濯足望八荒列宿羅心胸客帆詎肯駐搔首

蒼烟叢

澎浪磯阻風

浦口藏舟尋大壑篙師抱膝朝莫閒送風來從水
府廟濁浪欲碎小孤山太白猶高缺蟾墮長江未
盡歸鬢斑短歌聊復怨行路當有聽者凋朱顏

馬當湫阻風居人云非五日或七日風不止
謂之重陽信

拍岸回流逆上磯枯楊折葦靜相依趑墟漁子晨
爭渡賽廟商人晚醉歸重九信來風未憖大千行
徧昨俱非羈愁萬斛從頭數帶眼今秋又減圍

放舟風復不順再泊馬當對岸夾中馬當水
府卽小說所載神助王勃一席清風處也戲

題兩絕

萬里江隨倦客東馬當山嘴勒孤蓬無才解賦珠
簾雨誰肯相賒一席風
禁江上口栢山東三日荒寒繫短蓬卻憶宮亭湖
裏去隨人南北解分風

守風嘲舟子

奪命稠灘百戰餘守風端坐恰乘除日長飽飯佳
眠覺閑傍蘆花學釣魚

佛池口大風復泊

碧葦無思連天生青山有情終日橫風聲洶怒木
朝拔川氣流光珠夜明誰能坐守白頭浪我欲往
騎金背鯨俛仰之間撫四海可憐步步愁江程

長風沙

夕陽明遠帆高浪兀孤嶼綿綿淮山來閃閃沙鳥
去落木兩三家炊烟南北渡眉伸擊汰行夢愕阻
風處

九月八日泊池口

斜景下天末烟霏酣夕紅餘輝染江色潏灑琥珀

濃我從落日西忽到大汀東回首舊遊處曛薰錦
城中藥市并樂事歌樓沸晴空故人十二欄豈復
念此翁

池州九日用杜牧之齊山韻

年年佳節歌式微秋浦片帆還欲飛萬里蜀魂思
遠道九歌楚調送將歸杯中影分秋色木末江
光借夕暉細撚黃花一枝盡霏霏金屑滿征衣

離池陽十里清溪口復阻風

恰從秋浦挂蘆蔭又泊清溪十里餘愁水愁風吹
帽後昨雲昨雨授衣初遠尋草市沽新酒牢閉蓬

窗理舊書行路阻難催老病騷騷落雪滿晨梳

梅根夾

辛苦凌波棹平安人夾船月明漁浦網風側瓦窰
烟老圃容挑菜村巫橫索錢且投人處宿終夜得
佳眠

宿長蘆寺方丈

塔廟新浮水江洲舊布金聊憑一葦力與障萬波
侵帆影窺門近鐘聲出院深夜闌雷破夢欹枕聽
潮音

將至吳中親舊多來相迂感懷有作

望見家山意欲飛古來燕晉一沾衣回思客路豈
非夢乍聽鄉音真是歸新事略從年少問故人差
覺坐中稀不須更說桑榆晚霜後鱸魚也自肥

婺江黃昌植際五校字

范石湖詩集卷之十三

終

范石湖詩集卷之十四

婺源黃昌衢康謠叅訂

宣城袁啓旭士旦校閱

淳熙五年四月二日直宿玉堂懷舊

桂海冰天老歲華直廬重上玉皇家當年曾識青
青鬢惟有東牆一架花

雪山刁斗不停撾更把除書敢顧家珍重玉堂今
夜夢靜聞宮漏隔宮花

初歸石湖

曉霧朝暎紺碧烘橫塘西岸越城東行人半出稻

花上宿鷺孤明菱葉中信腳自能知舊路驚心時
復認鄰翁當時手種斜橋柳無限鳴蜩翠掃空

寄蜀州楊道人

老來萬事總蕭然猶憶西州暑雪邊爲報岷峩山
水道如今真箇得歸田

送同年萬元亨知階州

老我會斑萬里春憐君飛棹也浮秦當年千佛名
經裏又見西遊第一人
路入南山舊漢畿油油清渭照牙旗古來百戰功
名地正是雞鳴起舞時

十年關隴困科輸聖德如天盡掃除臨遣中和二
千石好乘春日下寬書

次韻蜀客西歸者來過石湖并寄舊僚

走遍埃塵倦鳥還故鄉元在水雲間黃梁飯裏夢
魂醒青蒨笠前身世閑鷗鷺飛來俱玉立松篁歲
晚各蒼顏岷峩交舊如相問鐵鎖無扃任客攀
十一月大霧中自胥口渡太湖

白霧漫空白浪滾舟如竹葉信浮沉科頭晏起吾
何敢自有山川印此心

靈祐觀

卽古神景宮

陽谷西門鎖洞宮古笞斑駁檜蒙茸百廊三殿惟
睂井萬壑千巖有瘦筇

林屋洞 一名陽谷洞

擊水搏風浪雪翻烟消日出見仙村舊知浮玉北
堂路今到幽墟三洞門石燕翹飛遮炬火金龍溪
阻護巖根寶鐘靈鼓何須扣庭柱宵辰已默存

包山寺

山上多松謂之飛松

仙塢遜半坐精廬遷古幢槁衲昔開山至今坐道
場熾然說慈忍禪海薰戒香穉竹暗寒碧飛松盤
老蒼船鼓入晏坐紅塵隔滄浪藤杖懶歸去共倚

蒲團床

毛公壇福地

松蘿滴翠白晝陰七十二峰中最深綠毛仙翁已
仙去惟有石壇畱竹塢竹檜掃壇石槎牙漢時風
雨生蘚花山中笙鶴尙遺響湖外人烟驚歲華道
人眸子照秋色邀我分山築丹室驅丁役甲莫見
嬉渴飲隱泉饑餌木

上方寺

檣棹古銷夏楮筇新上方珠灣鎖層折冰鏡沉空
光楓纈醉晴日橘黃明早霜閉門松竹逕隨處有

清涼

銷夏灣

蓼磯楓渚故離宮一曲清漣九里風縱有暑光無
著處青山環水水浮空

橘園

橘中有佳人招客果下游胡床到有■坐我金碧
洲沉沉剪綵山垂垂萬星毬奇采日中麗生香風
外浮折贈黃團雙珍逾桃李投折開甘露囊快吹
冰泉甌熱腦散五濁豈止沉疴瘳不知商山樂能
如洞庭不

華山寺

在西山盡處多諸公題詩

五湖西岸孤絕處旃檀大士來同任性空真水遍
清涼隨緣出現無方所蒙泉新潔鑑泉明淪茗羹
黎甘似乳何須苦問蓮開未桂子菖花了今古三
翁綵筆照青霞從此他山都不數我今閑行作閑
客暫借雲窗解包具魂清骨冷不成眠徹曉跣趺
聽粥鼓腳力有餘西塢盡明月灣頭更鳴榔卻上
東山喚德雲別峰應在銀濤許

縹緲峰

滿載清閑一棹孤長風相送入仙都莫愁懷抱無

消豁縹緲峰頭望太湖

鎮江放船過東山二首

打頭風急鼻雷鼾醉夢閑心鐵石頑惟有愛山貪
未厭西山纔了又東山
老禪竿木各逢場詩客端來共葦航一任巔風聒
高浪滿船笑語和

翠峰寺

來從第九天橋社繫歸船借問翠峰路誰家雪竇
禪應真庭下木說法井中泉公案新翻出諸方一
一傳

社中山放船

社下鐘聲送客船凌波撾鼓轉滄灣橫烟裊處雞
豚社落日濃邊橘柚山八表茫茫孤鳥去萬生擾
擾一舟閑湖心行路平如鏡陸地風波卻險艱

東山渡湖

渡船帆飽如張弓倏忽世界寒沖融堪輿無垠日
夜泛浩浩元氣蓬蓬風湖光日色不可辨但見水
精火齊合集成虛空波臣川后敬愛客約束秘怪
驅魚龍大千總作大圓鏡光中飛度迷西東蒼茫
一身無四壁八方上下惟孤蓬毛仙出迎笑相問

何乃自苦荒寒中吾生蓋頭乏片瓦到處漂搖稱
寓公猶嫌塵土礙人眼茲遊勝絕餘難同九衢車
馬恍昨夢付與一笑隨飛鴻

與游子明同過石湖

契濶相逢一笑歡當年森桂共驂鸞試談舊事醒
村酒仍趁新晴暖客鞍梅粉都皴啼宿雨柳黃不
展禁春寒從今鼎鼎多幽事仍喜蛙聲不在官

次韻同年楊廷秀使君寄題石湖二首

鳳儀當瑞九韶成何事栖鸞滯碧城公退蕭然真
吏隱文名藉甚更詩聲句從月脇天心得筆與水

甌雪椀清書到石湖春亦到平堤梅影縠紋生
半世輕隨出岫雲如今歸作臥雲人小山有賦括
游子大塊無私佚老身禪版夢中千嶂曉髮絲風
裏萬花春新年社甕鵝黃滿賸醉出頭紫領巾

自閭門騎馬入越城二首

日影穿雲亦未濃夜來疎雨洗清空村前村後東
風滿略教桃花一萬重

斷橋墮岸數家村雨少晴多減漲痕雪白鵝兒綠
楊柳日高猶自掩柴門

姚夫人挽詞

衿悅虞鰥後詩書孟母鄰高懷琴意靜晚福詔恩
新自古悲風木于今詠澗蘋松銘無溢美百世考
堅岷

北山堂千巖觀新成徐敘智運使吟古風相
賀次韻謝之

北山松竹堪怡顏千巖觀前多好山誰云都無卓
錫地亦尙有此茅三間洞門無鑰常不關小徑百
曲蒼龍盤衆芳迷人不知處片雲與我俱忘還花
前一杯重鼎呂明日屏田并灌圃種苗種豆從此
忙昨夜驚雷送膏雨

贈舉書記歸雲山二首

一枕清風四十霜孤生無處話淒涼相看只有龐
眉客還在雲丘舊草堂

四股澗松雷斧碎一圍巖桂燒痕枯不知階下跳
珠處舊竹春來有筍無

青山面目想孤依水石風林入夢思白髮蒼顏心
故在且如當日看山時

題查山林氏菴

庭戶清深宅翠微雪如佳壁喚題詩烟梢蠹蠹青
圍屋露葉鮮鮮綠滿籬宿雨一春纔汎鴨新蕪幾

日已藏碑山僧見客如枯木疑是嬾殘南岳師
木瀆道中風雨震雷大作
惡風奔雷何壯哉溪水欲立山欲摧石岸迸裂纜
邊樹胡床動搖船底雷靈巖塔後雨腳挂胷口廟
前浪花來蓬漏衣霑不足惜酒瓶傾側怨空壘

光福塘上

指點炊烟隔莽蒼午餐應可寄前莊雞聲人語小
家樂木葉草花淡巷香春已去空衣尚絮雨來何
晚稻初芒祗今農事村村急第一先陂貯水塘
與至先兄遊諸園看牡丹三日行徧二首

拄杖無邊處處過粉團紅繞奈春何閭門昨日看
不足今日婁門花更多

蜂蝶蕭騷草露漫小家籬落閉荒寒欲知國色天
香句須是倚欄燒燭看

次韻同年楊使君回自毘陵同泛石湖舟中
見贈三首

客舫中流下人家夾岸看落花堆錦暖吳藕鏤冰
寒莫厭清歡暫須知後會難小詩煩本事任禿綵
毫端

曲誤不須顧客狂當好看日斜雙槳急風駛夾衣

寒賸說歸田樂休歌行路難石湖三萬頃何處覓
憂端

北渚乘風渡西山帶霧看袖單嫌翠薄杯淺怯金
寒宿雨收全易春醒解卻難且畱行色任重肯過

蘇端

頃乾道辛卯歲二月望夜與周子充內翰汎
舟石湖松江之間夜艾歸宿農圃距今淳熙
已亥九年矣余先得歸田復以是夕泛湖有

懷昔遊賦詩紀事

石湖花月浮春空憶共仙人同短篷三年半醉吹

笛去櫂入濕銀天鏡中鶴鳴喚歸斗未沒卻步扶
疎花底月不知行到碧梅邊但見天風吹積雪月
圓月缺今幾回依舊滿湖金碧堆仙人還上玉堂
宿合有片時清夢來一笑流光飛電抹嫦娥相對
兩愁絕桂枝應亦老無花蟾兔不須疑鶴髮

懶林午坐

晴霄垂北窗臥我翠幄中不知幾斧鑿成此大虛
空前雲稍過盡後雲來無窮鳥雀有底忙激戰過
牆東不如雙飛蝶欵欵弄微風我亦困思生拋書
眼蒙茸

范石湖詩集九
秋前三日大雨

暑殘堪喜亦堪憎恰似沙場喋血兵縱有背城餘
燼在能禁幾度瀉簷聲

秋前風雨頓涼

秋期如約不須催兩腳風聲兩快哉但得暑光如
寇退不辭老景似潮來酒杯觸撥詩情動書卷招
邀病眼開明日更涼吾已卜暮雲渾作亂峰堆

秋後二日泛舟越來溪三絕

西風初入小溪帆旋織波紋縐淺藍行入鬧荷無
水面紅蓮沉醉白蓮酣

一川新漲熨秋光挂起蓬窗受晚涼楊柳無窮蟬
不斷好風將夢過橫塘

飯後茶前困思生水寬風穩信篙撐不知浪打船
頭響聽作凌波解珮聲

采菱戶

采菱辛苦似天刑刺手朱殷鬼質清休問楊荷浩
江曲只堪聊誦楚詞聽

曉起聞雨

老來稍喜睡魔清兀坐枯枝聽五更蕭索輪困憐
燭燼飛揚跋扈厭蚊聲登高事了從教雨刈熟人

范石湖詩集十
忙卻要清莫道西成便無慮大須濃日曬香秔

說虎軒夜坐

白雲淡處臥癡頑挂起東窗水月寬但得好詩生
眼底何須寶刹現毫端一身莫作官身想萬境都
如夢境看蟹舍隣翁能日醉呼來分與一蒲團

偶書

大行巫峽費車舟休向滄溟認一漚日下冰山難
把玩雨中土偶任漂流元無刻木牽絲技但合收
繩卷索休惟有酒缸并飯甌卻須秔秠十分收

睡覺

漏箭聲中斷角哀界窗猶有月徘徊心兵休爲一
蚊動句法卻隨孤鴈來漱罷玉池甘似醴夢餘金
鼓辨如雷夜長展轉添許事推枕蕭然一笑咍

閬門行送胡子遠著作守漢州

前年送君朝明光今年送君還故鄉錦官樓上一
尊酒萬里閬門折楊柳吳波沄沄蜀山蒼人生行
路如許長相逢相送鬢如雪人生能禁幾離別漢
南風月開春臺石湖水雲歸去來西棹東帆君未
了相逢還向閬門道

嘲蚊四十韻

暑魃方肆行羽孽亦厲習宵翹極么麼塊北累關
翕濕生同糞蝸腐化類宵熠初來開郭郛少進亘
原隰嚶如蠅聲薨聚若螽羽緝俄爲隱雷閔逐作
密霰集口銜鋼針鋒力洞衲衣襲啾聲先計議著
肉便噓吸立豹猶未定卓錫已淡入血隨姑噉升
勢甚轆轤汲沉酣尻益高飽滿腹漸急晶晶紫蟹
眼滴滴紅飯粒拂掠倦體煩爬搔瘁肌澀救東不
虞西擒一已竄十新癥蓓瘡漲宿暈斑爛浥竟夜
眼展轉連床歎于悒云何人戚歡乃繫汝張歛驅
以葵扇風熏以艾烟濕檠長鎮遠遮帳隙亟補葺

火攻憚穢臭手拍嫌腥汁伏翼佐掃除蛛網取收
拾薄暮洶交攻大明証未戢牛革厚逾羶齋介銛
勝斂遭汝尙欲困嗟人何以給夏蟲雖衆多罪性
相百什蜂虻豈房櫳蟣蝨但禪褶羊羶螳登俎驥
逸蝨附鬲蠓惟舞醯甕蟬止崇書袞蚤爲鶴所撮
蠅亦虎能執彼愆可貫死汝罪當獻級涼颯儻然
至醜類殆哉岌一吹嘴吻破再鼓翅翎繫三千躒
頡利百萬走尋邑快哉六合內蔑有一塵立虛空
旣清凉家巷得寧輯雞窗夜可誦蛩機曉猶織雨
簾繡浪卷風燭淚珠泣客來添羽觴人靜拂塵笈

沈石湖詩集十二
恍還神明觀似啓壞戶蟄消長誰使然智力詎能
及

閭門戲調行客

日夜飛帆與跨鞍閭門川陸路漫漫人生自苦身
餘幾天色無情歲又寒萬事惟思六如觀一杯奠
信四并難重陽雖過黃花少尙有遲開玉雪團

九月廿八日湖上檢校籬落

村南村北打稻聲荒園屐齒亦嬉曠菊邊便覺朝
陽好松下偏聞晚吹清一歲無非吾樂事千金不
博此閑行周遭踏過芙蓉岸足痺腰頑榭榭輕

晚步吳故城下

急行殊不顧榛菅風袖飄然勝羽翰拄杖前頭新
雉起浮圖絕頂一鵬盤醉紅匝地斜曛暖熨練涵
空漲水寒卻向東臯望烟火缺蟾先映榭林丹

上沙田舍

更無雲物起微陰隴畝人家各好音歲晚陽和歸
稻把夜來霜力到楓林兒童笑裏豐年面烏鳥聲
中落日心釀秫炊秔都入手賸揀腰腳辦登臨

與現壽二長老遊壽泉因話去年林屋之游

題贈二首

何年錫杖劇清甘天遣淡源壽此菴金罽萬枝浮
倒影爲作菊花潭

松風放浪入雲關二衲相從一士閒人與瘦筇俱
老健去年今日在包山

渡太湖

囊風閣雨半陰晴慘淡誰知造化心委命沉浮惟
一葉計身輕重亦千金紅塵猶道不勝險白浪莫
嗔如許淡晚得薌山堪寄纜臥聽鼉吼與龍吟

再渡胥口

古來此地快蓬心天繞明湖日照臨一鴈雲平時

隱見兩山波動對浮沉衰髯都共荻花老醉面不
如楓葉淡留戶釣徒來問訊去年盟在肯重尋

跨馬過練墟喜晴

稻穗初乾怕雨時晚來蒸暖欲霏微西風若肯吹
雲盡不惜飄飄側帽歸

晚歸石湖

何須駟馬炫鄉關只作歸農老圃看夢裏曾腰績
結佩年來新著情遊冠和烟種竹聊醫俗帶月聞
蛙不在官久矣此心恬不動如今併與此身安

北山堂開爐來坐

困眠醒坐一龕多竹洞無關新客過貪向爐中煨
榾柮嬾從掌上看菴摩閑無雜念惟詩在老不甘
心奈鏡何八萬四千安樂法元無秘密可伽陀

入城

十里清風一餉間片帆真欲解人顏林家莊近聞
鵝鴨船到閭門儘未關

次韻早蚊

羽蟲么麼塞區寰造化胡爲弗疾頑長養汗泥草
木處縱橫大地山河間夜聲雷動人力屈秋喙花
開天理還但願江湖無白鳥何須金鼎鑄神姦

冬至晚起枕上有懷晉陵楊使君二首

新衣兒女鬧燈前夢裏莊周正栩栩然騎馬十年聽
曉鼓人生元有日高眠
多稼亭邊有所思冬來撚卻幾行髭也應坐擁黃
紬被斷角孤鴻總要詩

寒雨

何事冬來雨打窗夜聲滴滴曉聲淙若爲化作漫
天雪徑上孤蓬釣晚江

戲贈腳婆

日滿東窗照被堆宿湯猶自暖如煨尺三汗腳君

休笑曾踏靴霜待漏來
除夜前二日夜雨

雪不成花夜雨來
壘頭一洗定無埃
小童卻怕溪橋滑
明日先生合探梅

次韻章秀才北城新圃二首

方流桃花塢窈窕入壺天
碧城當巖岫清灣如澗
泉風月欲無價聊費四萬錢
雪從春事起紅雲蜂蝶邊

西城如西塞桃花古來多
釣艇鱖魚肥前身張志和
烟霏幾白鷺風雨一綠簑
清江韻新引清絕勝

陽阿

夢中作

漠漠人間一氣平
虛無宮殿鎖飛瓊
碧雲萬里海光動
何處書來金鶴鳴

北城梅爲雪所厄

凍葉粘枝瘦欲乾
新年猶未有春看
雪花祇欲欺紅紫
不道梅花已怕寒

雪後六言二首

雨聲和淡巷
屐風力到短檠
燈可惜滴殘
簷雪從教漂盡河水

歲寒破屋萬卷風急疎窗一燈高臥眼生醉纈遠
遊鬚有豎冰

元夕大風雨二首

東風無賴妬華年一夜凄寒到酒邊放盡珠簾遮
晝炬莫教簷雨濕青烟
河傾海立夜翻盆不獨妬燈更損春凍澌笙簧猶
可耐滴翠梅頰勢須嗔

春懷

柳顰梅笑各相惱詩債碁讐俱見尋莫道幽居無
一事春來風物總關心

自橫塘橋過黃山

陣陣輕寒細馬驕竹林茅店小帘招東風已綠南
溪水更染溪南萬柳條

次韻李叔玠追路送筍

墮地錦棚茁解衣溫玉姿來償食竹債大勝仗雌
炊少日煮藜子老來煨芋師盤餐登異味指動已
先知

婺江黃昌儼若思校字

范石湖詩集卷之十四

終